

lis Gnovis

■ **LION.** Broade, muset e... «orelutis»



Dai 8 ai 12 di Novembar, il «Fogolâr» di Lion al cjape part al prin Campionât mondiâl di «Fabbricazione di

Orecchiette», inventât de clape «Rondini Pugliesi» e inmaneât a Bourg en Bresse, intant dal «Salone della Gastronomia Ainterexpo». A Bourg en Bresse e vîf une grande comunitât puliese, inlidrisade di 90 agns e zimulade cu lis comunitâts furlanis dai contors. In chê suaze, e je nassude la «Accademia della Nobil Pasta» che, direzude di Enrico Palmieri, e à proponût la grande disfide pes «orecchiaiole» di dut il mont. Te foto dal Archivi dal Fogolâr, scatade a Lion, si pues viodi une antepreme dal campionât. Tal cos, Palmieri e il responsabil dal «Fogolâr», Ezio Della Vedova di Gjavons, i mostrin a une sorestante de citât le «orecchiette friulane». La monture, ispirade de Rinassince, e je chê de Academie de «Nobil Pasta».

■ **MONFALCON.** Une rêt pal volontariât

La Federazion gurizane dal moviment di volontariât «MoVi», ai 17 e ai 18 di Novembar, e invade lis organizacions dal volontariât dal Friûl orientâl par un seminari-laboratori par imparâ a unî lis fuarcis e par sperimentâ strategjiis gnovis di lavôr comugnâl. La sperance e je chê di rivâ a tiessi une rêt teritoriâl di associazions pal intervent sociâl, in stât di confrontâsi ancje cu lis istituzions publichis. La convigne e sarà inmaneade li dal Oratori «San Michele».

■ **PORDENON.** Concors par viazadôrs

Al torne il concurs dal Istitût regionâl di studis europeus «Irsè» di Pordenon, che al promôf esperiencis di studi e di lavôr intal forest. Si podarà cjapâ part a «Raccontaestero 2018» fintremai ai 15 di Dicembar, spedint, par pueste eletroniche di cjarte («Irsè», strade Concordia 7, Pordenon), un articul o une conte (che no passi 3 mil batudis di calculadôr) dulà che si riferis une esperiencence personâl vivude tal forest. Si podarà vinci la spese di un altri viaç ator pal mont e i tescj a vignaran publicâts dal mensil pordenonês «Il Momento».

Joibe 8	S. Gofrèt	Lunis 12	S. Josafat Vescul
Vinars 9	Ded. Basiliche Lateran.	Martars 13	S. Cristian
Sabide 10	S. Leon il Grant	Miercus 14	S. Nicole Tavelic
Domenie 11	S. Martin Vescul	Il timp	Zornadis gris e fredis



Il soreli
Ai 14 al iève aes 7.06
e al va a mont aes 16.36.



La lune
Ai 15 prin cuart.

Il proverbi
No je mai stade ploie
che il soreli nol sedi tornât.

Lis voris dal mès
Cjapait sù patatis, caulis, rucule,
salate e articijocs.

Vanzeli di liberazion

A Verone
il Festival
de Dutrine sociâl

La libertât no si po copâ, e je come la vite: «si pues copâ une persone, ma la vite no; si po rindi sclâf cualchidun o un popul intôr, ma no si pues scancelâ la libertât»: a son pe- raulis penzis chês sielzudis par popularizâ la VIII edizion dal «Festival de Dutrine sociâl», programât a Verone dai 22 ai 25 di Novembar.

Par confrontâsi su «Il risc de libertât» a saran invidads teolics, operadôrs pastorâi e professôrs, sindacalscj e avocats, economiscj e funzionaris publics, coope- radôrs, voluntaris e sorestants. La orga- nizacion e je curade de Fondazion «Segni Nuovi», cul jutori di «Fondazione Cattolica Assicurazione», Circul «Noi Lievito», «Ucid», «Confcooperative», «Acai», Grops de Dutrine sociâl de Glesie («Dsc»), «Collegamento Sociale Cri- stiano» e «Movimento Studenti Catto- lici».

Lis voris dal Festival, che si pues dâsi in note mediant dal lûc internet eventi.dot- trinasociale.it, a saran logadis li dal «Cat- tolica Center» di strade Germania. La riflession e tacarà cuntun dibatiment su «Il presit de libertât», cul frari Ramzi Sidawi, econom de «Custodie di Tiera Sante», che al proponarà «una lettura della situazione nel Medio Oriente», e cul vescul albanês di Rreshen, monsi- gnôr Gjergj Meta, che al cjararà de trate «Dal regime comunista alla liber- tà». La zornade dai 23 di Novembar e scrutinarà l'impad de Dutrine sociâl sul teritori, cu lis contribuzions di relatôrs polonês e inglès. La situazion taliane e sarà travuardade cu lis esperiencis di Lamezia Terme e di Vittorio Veneto e mediant dai profundiments dai pro- fessôrs Rocco Pezzimenti de Universitât «Lumsa» («La Dsc tra magistero e pen- siero») e Daniela Ciravegna de Univer- sitât di Turin («Un nuovo modello di società e di economia a partire dalla Dsc?»). Pal mont dal Sindicât, a son



Convignis e dibatiments cun teolics, academics, economiscj e sorestants

Un laboratori
di ideis
e di esperiencis
positivis,
pal di di vuê
e pal avignî,
dai 22 ai 25
di Novembar

stadis programadis une taule taronde su «Libertà responsabilità e partecipa- zione: l'associazionismo sindacale come risorsa» e une convigne su «La partecipazione degli operai all'impresa». I avocats si confrontaran cui difensôrs dai dirits dal om e cu lis vitimis des vio- lencis. Cun Mauro Magatti e Lorenzo Pilon si fevelarà di «Tierç setôr» e di ge- nerativitât. I filosofis Dario Antiseri e Giulio Giorello a proponaran une ri- flession su «Democrazia avvelenata e libertât politica». Un spazi speciâl al sarà

dedicât a la brame di legalitât e a la zo- ventût, impegnade tes «Tavole pensan- ti» su Teritori, Imprenditorie e Inclusion sociâl. Su la riforme des Bancjis di credit cooperatif, al resonarà il ministri de Economie, Giovanni Tria, che al rivarà a Verone ai 24 di Novembar. Te stesse zornade, si discorarà ancje di auton- mie e di solidarietât e po di impegn politic. La ultime zornade dal Festival e varà par protagonist il mont feminin, contât cun trê storiis di feminis libaris.

Mario Zili

Al è saltât fûr il Lunari di Pre Toni pal 2019, ispirât dai tescj di pre Antoni Beline. Lu à metût adun Alida Peverè e Cristian Liberale

Al è saltât fûr il «Il Lunari di Pre Toni» pal 2019. Lu à metût adun Alida Peverè e Cristian Liberale, cu lis contribuzions di Marina Cocco, autore de cu- viertine, di Sandra Di Lenardo, Mariateresa Bravin «Titti de- sign», Ezio Cescutti, Roberta Ci- riani, Otto D'Angelo, Vera De Tina, Gianni Di Lena, Daniele

Giacomini, Mario Mussinano, Marisa Plos, Fausto Tosolini e Anna Zamolo. Daspò de pre- sentazion, fate ai 3 di Novem- bar, li de glesie di Visepente, il lunari ispirât dai tescj di pre An- toni Beline, si podarà cjatâlu a Visepente, Basilian, Bertùl, Co- droip, Cjampfuarmit, Colorêt, Maian e de Pléf di Vit.

Peraulis in dismentie

par cure di **Mario Martinis**

❖❖❖ **ARGAGN**

s.m. = arnese, attrezzo, strumento di lavoro
(dal latino *organium "arnese", proveniente dal greco *orgânion)
O vin l'argagn just par savoltâ la tiere.
Abbiamo l'arnese giusto per rivoltare la terra.

❖❖❖ **ARIE**

s.f. = loggia; aia; portico nel cortile rustico
(dal latino arĕa "covoni distesi trebbiati sull'aia")
Sabide cu ven a fasaran il licôf sot la arie.
Sabato prossimo faranno la merenda sotto la loggia.

❖❖❖ **ARTICJOC**

s.m. = carciofo
(dallo spagnolo antico alcarchofa, la cui base proviene dall'arabo al haršuf)
I articijocs a son bogns cun ai, vueli e savôrs.
I carciofi sono buoni con aglio, olio e prezzemolo.

❖❖❖ **ASSE**

s.f. = rabbia, uggia, animosità
(dal tedesco hass "odio, avversione")
Lidie e à in asse Poldo par vie che no i à puartât lis rosis.
Lidia ha in uggia Leopodo perché non le ha portato i fiori.

❖❖❖ **ATOM**

s.m. = autunno
(dal latino attūmnus "autunno")
Al è stât un atom saren e tividin.
È stato un autunno sereno e tiepido.

❖❖❖ **ATRAT**

s.m. = fascino
(dal verbo atrâr "attrarre", originato dal latino ad- e traĕre)
Clarisse e prove un grant atrat par chel zovin.
Clarissa prova molto fascino per quel ragazzo.